

Aschtoh III



Texscht : Mike Sutter
Musig : Mike Sutter

**Gäng we ni nöime ire Schlange schtange
schtang i garantiert ir lätze a
wär's linggs u rächts scho lengschtens vorwärts gange
chum i ke Santimeter voraa**

**Vor mir die unmügleschte Gseue
Schwär vo Begriff und kompliziert
Wo mit Absicht sech vor mi häre schteue
Was mini Närve masslos schtrapaziert!**

**Ä Fründ vor mir hett gmeint, dass ig Mueh
Mit Aschtoh heig do sig i säuber tschuwd
Mit Verschtang heig das härzlech weni z'tüeh
Aschtoh sig ä Frog vor Geduwd**

**Doch Geduwd isch nid unbedingt mi Schterchi
Bim Aschtoh chunnt de no drzue
Das Gfüeu, dass me mi iipferchi
Bringt mi nuwkomaplötzlech us dr Rueh**

**Sowieso, ig ha ender z'Gfüeu
Ä Fluech isch's wo mer s'Schlange schtou vergäut
Wo mi ziusicher länkt is gröschte Gwüeu
U mir weiss nid was aus vor d'Nase schteut**

**Ändlech, ändlech chum i dra
I legge mini lichöif ufs Band
I däm Momänt merke ni ig, i ha
S'Gmües vergässe z'wäge, O Schand!**

**D'Kassierin schtarrrt mi fassigslos a
Wie nes Louffür geit es umenang
S'wird muggsmüüslischtu und e Ma
Hinger mir zischet öppis vo Verschtang**

**Gäng we ni nöime ire Schlange schtange
schtang i garantiert ir lätze a
wär's linggs u rächts scho lengschtens vorwärts gange
chum i ke Santimeter voraa
i schtange doch so nid gärn a**